

<https://news.usm.my>

Berita Mutakhir

14  
MAR

## 2 UNIVERSITI SWEDEN RANCANG KERJASAMA AKADEMIK DENGAN USM

USM, PULAU PINANG, 12 Mac 2016 – Delegasi daripada Universiti Kristianstad dan University Hamstad Sweden berkunjung ke Universiti Sains Malaysia (USM) baru-baru ini untuk menerokai peluang kolaborasi dan membangunkan beberapa program akademik secara bersama.

Penyelaras Antarabangsa, Anna Karin Sjodahl, Ketua Pejabat Antarabangsa Universiti Kristianstad, Lise Lotte Nilsson dan Penasihat Kanan Canselori Universiti Hamstad, Ulfl Irarson bertemu Pengarah Pusat Keantarabangsaan Mobiliti dan Kerjaya (PKMK), Dr. Muhizam Mustafa di sini.

Lise Lotte berkata, tujuan utama mereka ke USM adalah untuk mengadakan perbincangan mengenai rancangan kerjasama akademik antara USM dengan universiti di Sweden.

“Kami melihat pendekatan kerjasama ini sebagai satu permulaan yang baik dan berharap akan mengadakan hubungan melalui kolaborasi akademik yang lebih spesifik pada masa akan datang,” kata Lise.

Ulfl Irarson pula berkata, mereka sangat berminat untuk mewujudkan kolaborasi dengan program pengajian tertentu yang ditawarkan di USM yang lebih kurang sama dengan program yang ditawarkan di Universiti Sweden.

“Saya sangat menyokong pendekatan kerjasama ini dan akan memastikan kerja-kerja yang baik sebegini dapat diteruskan dalam jangka masa yang panjang,” kata Ulfl.

Tambahnya, persamaan yang wujud dalam program akademik di antara Hamstad dan USM dapat memberi nilai tambah kepada usaha pengantarabangsaan kedua-dua pihak, selain membantu meningkatkan mobiliti pelajar.

Muhizam Mustafa yang mempengerusikan kunjungan tersebut pula berkata, kira-kira 300 orang pelajar mengikuti program pertukaran pelajar setiap tahun di USM.

“Sehubungan dengan itu, kami berhasrat untuk mendapatkan kerjasama daripada universiti Sweden terutamanya dalam bidang akademik,” kata Muhizam.

Ketiga-tiga wakil daripada Sweden tersebut turut kagum dengan kebolehan pelajar Malaysia yang fasih bertutur dalam Bahasa Inggeris, selain berpendapat USM adalah kampus yang cantik dan indah dari segi pemandangannya.



Share This

**Pusat Media dan Perhubungan Awam / Media and Public Relations Centre**

Level 1, Building E42, Chancellory II, Universiti Sains Malaysia, 11800 USM, Pulau Pinang Malaysia

Tel : +604-653 3888 | Fax : +604-658 9666 | Email : [pro@usm.my](mailto:pro@usm.my) (<mailto:pro@usm.my>)

Laman Web Rasmi / Official Website : [Universiti Sains Malaysia](http://www.usm.my) (<http://www.usm.my>)

[Client Feedback / Comments](http://web.usm.my/smbp/maklumbalas.asp) (<http://web.usm.my/smbp/maklumbalas.asp>) | USM News Portal. Hakcipta Terpelihara USM 2015